

四庫全書

集部

欽定四庫全書

宋藝圃集卷十一

明 李裛 編

晁冲之二十一首

古樂府

大星何歷歷小星爛如石
披垣崔巍橫紫微十二羽林
森北極今夕何夕月欲沉
虎抱空闌龍厭直崢嶸北斗
著地垂手去瓠瓜不盈尺
嚴陵醉卧光武傍浮楂正值

天孫織王良挾策飛上天傳說空騎箕尾立君不見茂
陵棄子欲登仙自將壯士終南邊忽然遭窘出璽綬歸
來下詔除民田阿瞞急示來輿物鮮卑仍棄珊瑚鞭又
不見古來垂堂戒華屋敵國挾轉戎接轂白龍魚服誤
網羅孔雀金華被牛觸

此篇好奇過
甚不可解

洗馬次十二兄之道韻

灞橋春水波粼粼橋邊結束何圉人解鞍傍水如洗馬
飛龍九尺凌漪淪風髣霧鬣才一注玉花照影光滿身

月題却貫黃金勒更覺閃艷開精神主人貴相不必問
特賜內廐天麒麟即今此物亦安用燕山萬里靖無塵
嫖姚功高自不出長鳴但踏城西春君不見少陵時已
無伯樂尚有曹將軍寫真

夷門行贈秦夷仲

君不見夷門客有侯嬴風殺人白晝紅塵中京兆知名
不敢捕倚天長劍著崆峒同時結交三數公聯翩走馬
幾馬驄仰天一笑萬事空入門賓客不復通起家簪笏

一作
筆

明光宮嗚呼男兒名重太山身如葉手犯龍鱗心
莫懾一生好色馬相如慷慨直辭猶諫獵

法一以余所贈墨為不佳

上人好事世莫當羅列四寶如文房廣交往往得奇物
有墨尺度如圭長秋麋折角膠與力春麝入臍煤生香
已將雪覆輕羅帕更令花映紅紗囊草堂老人不自料
亦藏一餅誇精妙自言和璧持贈君反為燕石遭譏誚
嗚呼萬事孰不然古今工拙那同調君不見當年諸李

數不到廷寬只今賜墨無老潘

復以承晏墨贈之

我聞江南墨官有諸奚老超尚不如廷珪後來承晏復
秀出喧然父子名相齊百年相傳文斷碎彷彿尚見蛟
龍背電光屬天星斗昏雨痕倒海風雲晦却憶當年清
暑殿黃門侍立才人見銀鈎洒落桃李牋牙牀磨試紅
絲研同時書畫三萬軸大徐小篆徐熙竹御題四絕海
內傳秘府毫芒惜如玉君不見建隆天子開國初曹公

受詔行掃除王侯舊物人今得更寫西天貝葉書

次韻集津兄會羣從王敦素宿王立之園明日西

征馬上寄示諸人

以道嘗監陝
府集津倉

秋高訪幽居風急桑未落天寒鷄犬靜地僻門巷闔主
人避世賢自說久棲泊呼兒出罇罍梨栗亦不惡賓客
四五人談笑動林薄夜闌慘無歡離憂倏中作伯也天
下士千金輕一諾揮斤楊墨徒正是鄒魯學如何但銀
魚生事了無託惜哉桃李姿見笑葵與藿鷄鳴驅車行

令人意參錯

次二十一兄季此韻

憶在長安最少年
酒酣到處一欣然
獵回漢苑秋高夜
飲罷秦臺雪作天
不擬俳優陪殿下
相隨于蒨過樓前
如今白髮山城裏
宴坐觀空習斷緣

雪效柳子厚

一作贈一
兄上人

月落鷄聲寒曉色
靜茅屋開門驚不知
夜雪壓修竹槎
牙生新冰鱗甲刻
溪谷晶晶州渚明
列列川原肅孤蹲

雀不動沈酣客猶宿呼童晨汲歸獨漱寒泉玉

都下追感往昔因成

少年使酒走京華縱步曾遊小小家看舞霓裳羽衣曲
聽歌玉樹後庭花門侵楊柳垂珠箔窗對櫻桃卷碧紗
坐客半驚隨逝水主人星散落天涯

自然詩

先生手不廢經營白屋憑虛結此亭燕麥兔絲侵密坐
南箕北斗挂踈櫺青松夾日交傾蓋翠栢分風倚列屏

莫道君家無長物
案頭燈火有流螢

蔡晉如挽歌

南部清笳咽東門素旐飛
如何一老沒不及二疏歸
宇宙復見死生從此違
吾年未四十已歎故人稀

感梅憶王立之

王子已仙去梅花空自新
江山餘此物海岱失斯人
賓客他鄉老園林幾度春
城南載酒地生死一沾巾

送僧

無端伏枕日不見放舟時晚得平安報初成送別詩山
深歸履急江闊度杯遲定許同香火終參慧遠師

懷濟北弟姪

久客思吾子生涯滯故鄉獨攜高士傳翻憶紫香囊合
榻言猶在同堂樂未央翩翩春草夢隨意遶池塘

春日

陰陰溪曲綠交加小雨翻萍上淺沙鶯鳴不知春去盡

爭隨流水趁桃花

一本作春色不堪流水
送雙浮鳴鴨趁桃花

樂府

自摘茶蘼滿架空擬將豪氣敵春風
欲知盞面玻璃間看照紅顏在酒中

和二十二弟

靜處偷看肘後書幽棲古有此人無
綠蓑青笠非吾事白浪狂風滿太湖

和新鄉二十一兄華嚴水亭

近市危樓通野寺隔溪高柳接京華
蕩舟不怕風波急

看盡芙蓉十里花

與秦少章題漢江遠帆

雲埋鳳林寺浪打鹿門山今日江風惡郎船勸不還

次韻陳叔易柳橋

落日河梁上遲留客去時近隣無遠送莫挽最長枝

晁補之一首

錢塘

錢塘江北百餘里漲沙不復生菰蒲沙田老桑出葉麓

江湖打根根半枯八月九月秋風惡風高駕潮晚不落
鼓聲鑿鑿艫咿喔爭湊富春城下泊

晁詠之一首

初行山

靄靄初蒸雲落落欲墜石山深多晚花照水自紅碧魚
艇入烟小松竹凌烟直西風漾碧波扁舟恣崎側客從
北方來苦遭世俗迫登臨雖宿願山川多未識浩蕩涉
寒流躋攀並蒼壁捫蘿窺鳥道踏逕窮人迹清泉洗塵

欽定四庫全書

宋詩集
卷十一

心山鳥慣幽客逸興良未已日下千崖赤十載孫承公
好具登山屐

晁說之一首

打毬

閭闔千門萬戶開三郎沈醉打毬回九齡已老韓休死
無復明朝諫疏來

文同二首

朱櫻桃

金衣珍禽弄深樾禁籞朱櫻班若纈上幸離宮促薦新
藤藍寶籠貂璫發凝霞作丸珠尚軟油露成津蜜初割
君王午坐鼓猗蘭翡翠一盤紅韎鞬

新晴山月

高松漏疎月落影如畫地徘徊愛其下夜久不能寐怯
風池荷卷病雨山果墜誰伴予苦吟滿林啼絡緯

石延年二首

張氏園亭

亭館連城敵謝家
四時園色闢明霞
門迎西渭封侯竹
地接東陵處士瓜
樂意相關禽對語
生香不斷樹交花
從遊會約無留事
醉待參橫落日斜

瀑布

飛勢掛岳頂無時
向此傾玉虹垂地
色銀漢落天聲萬
丈寒雲濕千巖暑
氣清滄浪不足羨
就此濯塵纓

韓駒三首

憶舊贈人

憶昨昭文并直廬與君三載侍皇居
花開輦路春迎駕
日麗蓬山曉曝書
學士南來尚崑穴
神州北望已丘墟
忽逢漢節臨江上
握手西風泪滿裾

題太乙真人蓮葉圖

太乙真人蓮葉舟
脫巾露髮寒飈颭
輕風為帆浪為檝
卧看玉宇浮中流
中流蕩漾翠綃舞
穩如龍驤萬斛舉
不是峯頭十丈花
世間那得葉如許
龍眠畫手老如神
尺素幻出真天人
恍然坐我水仙府
蒼烟萬頃波粼粼

玉堂學士令劉向禁直宮堯九天上不須對此融心神
會植青藜夜相訪

代葛亞卿作

君住江濱起畫樓
安居海角送潮頭
潮中有妾相思淚
流到樓前更不流

沈括十二首

潤州甘露寺

丞相高齋半草萊
舊時風月滿亭臺
地從日月生時見

眼到江山盡處回三國是非春夢斷六朝城闕野花開
心隨潮水漫漫去流過烟村半日來

仙都

苔封輦路上青山鶴馭遼天去不還惟有銀河秋夜月
鼎湖烟浪到人間

開元樂詞

三首

樓上正臨宮外人間不見仙家寒食輕烟薄霧滿城明
月梨花

按舞驪山影裏回鸞渭水光中玉笛一天明月翠華滿
陌春風

殿後春旗簇仗樓前御隊穿花一片紅雲闌處外人遙
認官家

姑熟

新晴渡口百花香石子池頭鴨弄黃捲幔夕陽留不住
好風將雨過梅塘

江南曲

新秋拂水無行跡
夜夜隨潮過江北
西風捲雨上半天
渡口微涼含曉碧
城頭鼓響日脚垂
天際籠烟鎖山色
高樓索莫臨長陌
黃竹一聲無北客
時平田苦少人耕
唯有蘆花滿江白

凱歌

五首

先取山西十二州
別分子將打衙頭
回看秦塞低如馬
漸見黃河直北流

天威捲地過黃河
萬里羌人盡漢歌
莫堰橫山倒流水

從教西去作恩波

馬尾桐琴隨漢使曲聲猶自怨單于彎弓莫射雲中鴈
歸鴈如今不寄書

旗隊渾如錦繡堆銀裝背嵬打圍回先教靜掃安西路
待向河源飲馬來

靈武西涼不用圍蕃家總侍納王師城中半是關西種
猶有當時軋吃兒

郭祥正七首

訪隱者

一徑沿厓踏蒼壁半塢寒雲抱泉石
山翁酒熟不出門殘花滿地無行迹

天柱閣

羣峯奔來一峯起千丈芙蓉碧霄裏
老松自作孤鳳吟潮浪時生三井水

別瀾峯閣

一溪清瀉萬山重風物能留邨曼容
後夜相思憂思極

金
月明孤影伴寒松

鳳凰臺

高臺不見鳳凰遊
浩浩長江入海流
舞罷青娥同去國
戰殘白骨尚盈丘
風搖落日催行棹
潮擁新沙換故洲
結綺臨春無處覓
年年荒草向人愁

金山寺

金山杳在滄溟中
雪崖冰柱浮仙宮
乾坤扶持自今古
日月彷彿躔西東
我泛靈槎出塵世
搜索異境窺神工

一朝登臨重太息四時想像何其雄
卷簾夜閣掛北斗大鯨駕浪吹長空
舟摧岸斷豈足數徃徃霹靂鋌蛟龍
寒蟾八月蕩搖海秋光上下磨青銅
鳥飛不盡暮天碧漁歌忽斷蘆花風
蓬萊久聞未成徃壯觀絕致遙應同
潮生潮落夜還曉物與數會誰能窮
百年形影浪自苦便欲此地安微躬
白雲南來入我望又起歸興隨征鴻

寄題九華樓

千金建傑閣遙對九華峯
紫光射曉日璀璨錦芙蓉
南

風吹秀色半落尊酒中酒味愈冷冽琴聲又玲瓏飄然
紫霄想何日附冥鴻

蓮根有長絲

蓮根有長絲不供貧女機柳梢有飛綿不暖寒者衣朝
歌悠悠暮歌短下地沉沉上天遠東生白日還西流志
士長懷萬古愁

秦觀四十八首

游仙詞

四首

陰風一夜攪青冥風定霏霏霰雪零想見玉清真境上

白虛光裏誦黃庭

霰雪一作雪霰

夜深樓上撥書眠天在闌干斗角邊風掃亂雲毫髮盡

獨留壁月照人圓

斗角一作四角

天風吹月入闌干烏雀無聲子夜閒織女明星來枕上

了知身不在人間

此首又見東坡集中

本是匡山種杏人出山來事碧虛君上清欲問因何事

請看仙山十丈文

十丈一作十齋

秋日 三首

霜落邗溝積水清
寒星無數傍船明
孤蒲深處疑無地
忽有人家笑語聲

月團新碾淪花薺
飲罷呼兒課楚詞
風定小軒無落葉
青蟲相對吐秋絲

連卷雌蜺掛西樓
逐雨追晴意未休
安得萬粒相向舞
酒酣聊把作纏頭

牽牛花

銀漢初移漏欲殘
步虛人倚玉闌干
仙衣染得天邊碧
乞與人間向曉看

納涼

攜杖來追柳外涼
畫橋南畔倚胡牀
月明船笛參差起
風定池蓮自在香

送僧歸遂州

賢師本巴蜀浪跡遊
淮海定水湛虛明
戒珠炯圓彩飄零
鄉縣異曉晚星霜改
明發又西征孤帆破
煙靄

春日雜興

三首

飄忽星氣徂青陽
迫遲暮鳴飛各有適
赤白紛無數雨
砌墮危芳風軒納飛絮
褰幃香霧橫岸幘雲峯度
林影舞窗扉池光染衣履
參差花鳥期
蹭蹬琴觴趣
撫事動幽尋
感時遺近慕
秣馬膏余車
行行不周路

二

潭潭故邑井猗猗
上宮蘭不食自清潔
莫服更幽閒
志士恥弱植
卷跡甘飢寒
佳晨追良覲
觸物懸悲端
川途

眇回遠經歲曠音翰豈不慕裘馬說得非所安蟬冕多
休迫繩樞尠憂患枉尋竟何補方枘誠獨難

三

吳會雖褊小海濱富奇峯天雞一號叫劍戟明遙空谿
谷相徑復深林杳攢叢猿吟虎豹啼雲氣迷西東中有
遯世士超然閔孤蹤被蘭服明月起坐松聲中夜鍛吸
沆瀣朝琴庇青葱騎星友元氣巢許安可同俛眄區中
人飛埃集毛鋒問津或不繆從子游鴻蒙

同子瞻端午日遊諸寺賦得深字

太史抱孤韻暢懷在登臨別乘載鄒枚佳辰事幽尋參
差水石瘦窅窕房櫳深清磬發踈箔妙香橫素襟復登
牢堵波環回矚嶽壑雙溪貫城郭暝色帶孤禽涼颼動
爽籟薄雨生微陰塵想澹清漣牢愁洗芳斟揮簞訂往
古援毫示來今愧無刻燭敏續此金玉音

次韻奉酬丹元先生

金華紫烟客來作牧羊兒至言初無文尋繹自成詩二

景入妙解元氣含烟詞憐我鬣滄浪黃埃眩蟲絲勸解
冠上纓一濯含風漪攝身列缺外倒躡蜿蜒髻維斗錯
明珠望舒耿脩眉真游無疆界浩蕩天風吹

次韻夏侯太冲秀才

儒官飽閒散室若僧房靜北窗腹便便支枕看斗柄或
時得名酒停午猶中聖醒來復何事秉筆賦秋興焉知
懶是真但覺貧非病茫茫流水意會有知音聽鍾鼎與
山林人生各天性

與子瞻會松江得浪字

松江浩無旁垂虹跨其上漫然銜洞庭領畧非一狀
恍如陣平野萬馬攢穹帳離離雲抹山窅窅天粘浪
烟中漁唱起島外征帆颺愈知宇宙寬斗覺東南壯
太史主文盟諸豪盡詩將超搖外形檢語笑供頡頏
嫵媚棄追逐揆刺亦從放獨留三百缸聊用沃軒曠

荷花

方塘收雨脚踏日半遙岑芙蓉萼淨娟娟麗服撫翠余無

言意自遠欲渡秋水深緬懷平生人對此詎可尋弄芳
惜晚晚酒至誰與斟天涯有歸雲聊寄相思心心開獲
清賞芙蕖一何綺美人艷新粧歛袂照秋水端如蕩子
妻顧自良家子黃金選燕趙搖落對江沚薄暮風雨來
獨立淚如洗望君君詎知傾宮定誰似

同子瞻賦游惠山

輟棹從幽討籃輿入青蒼圓頂相邀迓旃檀燎深堂層
巒淡如洗傑閣森欲翔林芳含雨滋岫日隔林光涓涓

續清溜靡靡傳幽香俯仰佳覽眺悠哉身世忘

夜坐懷莘老司諫

次韻
參寥

六合寥寥信茫昧中有日月無根柢古往今來漫不休
青髮素顏從此逝嗟予自少多邇迴氣血未衰心已艾
北渡長淮霜入履南窺禹穴塵生袂日鑿一竅渾沌死
雖有餘風終破碎回車復路可無緣三問道人三不對

和王通叟琵琶夢

鷓鴣鳴時衆芳歇華堂夢斷音容絕風驚玉露不成圓

一夜芙蓉泣秋月金紋捍面紫檀槽曾抱花前送酒舫
庾郎江令費珠璧小研紅牋揮兔毫風流雲散令人瘦
忍看麴塵昏錦綬楚水悠悠更不西上天破鑑空依舊

題驀囊圖

雙瞳夾鏡權協月尾鬣蕭森澤於髮鞍銜不施韁復脫
旁無馭者氣騰越地如砥平丘隴滅天寒日暮抱飢渴
驤首號鳴思一發超軼絕塵入恍忽東門京鑄久銷歇
曹霸丹青亦云沒賴有龍眠戲揮筆眼前時見千里骨

玉臺閨闔相因依嗟爾龍媒空自奇鸞旗日行三十里
馬用逐風追電為

贈女冠暢師

瞳人剪水腰如束一幅烏紗裏寒玉飄然自有姑射姿
回首粉黛皆塵俗霧閣雲窗人莫窺門前車馬任東西
禮罷曉壇春日靜落紅滿地乳鷓啼

宿金山

山南山北江水流半空金碧隨雲浮
我來仍值風日好

十月未寒如晚秋山僧引客尋蒼翠
歷卷參差到平地
萬里風來拂骨清却憶人間如夢寐
夜深無風月入扉
相對老人如槁枝流水與天爭入海
共笑此心誰得知
下山却向中澗望翻憶當時在屏幃
老母思兒且欲歸
回首雲峯已天上

過六合水亭憶裴博士次韻

二首

晚憇孤亭上羸驂繫斷柯
荒門寒帶露空檻閣增波
往
事青山在餘生白鳥過
誦言成絕語疊疊迫陰何

二

折柳相從地重來失舊柯
林光延晚照岸影動微波
隔浦檀欒密當簷翡翠過
主人成異物搔首奈情何

呂與叔挽章

二首

舉舉西州士來為邦國華
藝文尤爾雅經術自名家
正有高山仰俄成逝水嗟
賢人各有數不獨歲龍蛇

二

數日音容隔人琴遂已虛
門生應有謚國史可無書
舊

室懸蛛網遺編走蠹魚定無封禪草平日笑相如

流觴亭次韻

縹緲雲巒欲盡頭灑然華構別飛流朱盤漱灩開冰鑑
碧甃紫紆走玉虬毛骨漸驚超濁界風烟驟覺變清秋
更憐白足如霜句可羨溪邊六逸遊

遊龍瑞宮次程公韻

靈祠真館閤山隈形勢相高對越臺莓徑翠依屏上轉
藕花紅繞鑑中開鶴銜寶箭排烟去龍護金書帶雨來

夾道萬星攢騎火滿城爭看使君回

次韻馬忠玉喜王定國還自濱州

淮海相逢一解顏紛紛歲月夢魂間
初驚漁艇迷花去忽認星槎拂斗還
桂嶺暮登猿斷續槐堂春到鳥綿蠻
石渠舊議行當復未信佳時得自閒

次韻酬周開祖宣義

并州令尹古人風淮海相忘十載中
麗句曉披花綽約清談初扣玉丁東
追攀昔共猗猗子嗜好今同桑苧翁

所惜華船輕解綵未窺笠澤故書叢

別程公闕給事

人物風流推鎮東名郎持節作元戎樽前倦客劉師命
月下清歌盛小叢裘弊黑貂霜正急書傳黃犬歲將窮
買舟江上辭公去回首蓬萊夢寐中

和莘老游龍洞

葦蕭傳火度冥冥乍入清都醉魄醒草隱月崖垂鳳尾
風生陰穴帶龍腥壁間泉貯千鍾碧門外天橫數尺青

更欲仗筇留頃刻却疑朝市已千齡

春日寓直有懷參寥

觚稜金爵自宮堯藏室春深更寂寥捫虱幽花歆露葉
岸巾高柳轉風條文書几上鬚髯變鞍馬塵中歲月銷
何日一筇江海上與君徐步看生潮

次韻裴仲謨和何先輩

汝南古郡寡參尋兀兀長如鶴在陰支枕星河橫醉後
入簾風絮報春深青山未落詩人手白髮誰知國士心

多謝名郎傳綠綺愧無佳句比南金

次韻劉遜父以寧齋詩二軸作以還之

揚舲偶過海遼州一見名郎破百憂荀氏諸龍俱俊偉
河東小鳳最風流明珠白璧堪投報細草幽花入獻酬
別駕舊齋何足念文昌新府待公游

燕觴亭

碧流如鏡羽觴飛夏木陰陰五月時清渭日長遊女困
武陵春去落花遲玉笙吹罷觥籌錯密炬燒殘簪珥遺

吳越風流公第一未輸山簡習家池

送佛印

抱袍初捨蔚頭藍江月松風處處參他日惠林馬上首
幾年彌勒作同龕真珠撒帳開新座飛鳥銜花繞舊庵
雲散虎溪蓮社友獨依香火思何堪

致政通議口號

秋空畫隼照新晴符隱庵前小隊停玉斚金醪通繾綣
鳳笙龍管入青冥靚粧醺酒花侵席寶獸呀香露滿庭

太史應占豫州分上台星近老人星

晚出左掖

金爵觚陵轉夕暉
翩翩宮葉墮秋衣
出門塵障如黃霧
始覺身從天上歸

和程給事贈遺道判

二首

囊中玉色已經餐
醉拂絲桐坐杏壇
應笑倦游塵滓客
鬢毛蕭瑟事鉛丹

二

漢武游心縹緲間
文成五利盡登壇
何如屈曲韓夫子
不羨神君白玉丹

盆池釣翁

誰刻仙材作釣翁
尺池終日釣微風
令人却憶鴟夷子
散髮五湖狂醉中

無題

掃地燒香閉閣眠
簾紋如水帳如烟
客來夢覺知何處
挂起西窗浪接天

聞鴈懷邵仲恭

楚澤吳天去未遲
煩君且傍蒜山飛
白袍居士如相問
為說淄塵欲滿衣


白馬寺晚泊

濛濛晚雨暗回塘
遠樹依稀不辨行
人物漸稀跡磬斷
綠蒲叢底宿鴛鴦

雪上感懷

七年三過白蘋洲
長興諸豪載酒游
舊事欲尋無處問

雨荷風蓼不勝秋



宋藝圃集卷十一

欽定四庫全書

集部

宋藝圃集卷十三

詳校官中書臣陸湘

侍讀臣繇球覆勘

總校官庶吉士臣何思鈞

校對官編修臣李堯棟

謄錄監生臣毛杞

欽定四庫全書

宋藝圃集卷十二

明 李袞 編

趙抃九首

清獻在當時不以詩名余家偶有其集就中拈數首如此然亦足觀也已

洞真觀

木老巖垓冷泉飛月殿寒栖真無一事清嘯倚闌干

挽黃洞

靈洞古壇基烟蘿接翠微自西春又晚不見羽人歸

橫溪洞飛泉

寒瀑落春巖天垂百丈縑更疑仙客宴不捲水晶簾

嶽麓寺

古木與雲齊門前百丈梯我來煩想滌疑是過靈溪

和沈太博會春晚歸

未醉樽前未可歸青春九十日芳菲名園一夜狂風雨
苔上殘花點綠衣

和沈太博小圃偶作

日烘薄霧開柔陌風冒遊絲着柳條語燕啼鶯自掠亂
驚人殘夢是春朝

題中隱堂

植杖焚香貝葉經主人無事掩松扃兀然隱几秋宵靜
雲在諸峯月在庭

次韻程給事謁禹廟

春色湖光照錦衣岸花汀草共芬菲若耶溪上遊人樂
舉棹狂歌半醉歸

劉敞二首

雜詩效玉川體

毀巢鳳不至竭澤龍不游賢者有所歸得非龍鳳傳周
公下白屋聖德被九州趙禹謝賓客漢朝以為優澆淳
不相襲用舍何其繆苟徇一身利不為萬姓謀哀彼扶
杜詩死生遺道周

雜詩

鑿井取泉飲上山採薇食豈不信憔悴所願皆我力泉

也非難致微也不易得志士恥徒飽衆人苟所獲犧牲
畏芻豢樊籠害羽翼晤理宜在早無為晚更惑

劉攽三首

詠長蘆寺

越舶吳商倚萬橈紺園金刹起中霄魚龍聽法因多雨
江海歸心每上潮林黑夜深燈影白川平天濶梵聲遙
心知水怪俱調伏惜取靈犀不用燒

絕句

青苔滿地初晴後
綠樹無人晝夢餘
惟有南風舊相識
徑開門戶又翻書

絕句

壁門金闕倚天開
五見宮花落古槐
明日扁舟滄海去
却將雲氣望蓬萊

崔鷗二首

江月圖

冥冥一葉輕
不知水與天
獨於灝氣中
仰見素壁圓
超

然狂道士起視清夜闌自拈白玉笛吹此江月寒想當
萬籟息逸響流空烟我從江海來形留意先還何當買
魚蓬追此水墨仙

春日村居

春草門前已沒靴更無人過野人家離離細柳時聞雨
淡淡疎簾不隔花

賀鑄七首

望夫石

亭亭思婦石下閱幾人代蕩子長不歸山椒久相待微
雲陰髮彩初月輝蛾黛秋雨疊苔衣春風舞羅帶宛然
姑射子矯首塵冥外陳迹遂無窮佳期從莫再脫如魯
秋氏妄結桑下愛玉質委淵沙悠悠復安在

題定林寺

破冰泉脈漱籬根壞衲遙疑挂樹猿蠟屐舊痕尋不見
東風先為我開門

艤船當利江口待風

一葉寄津口怒濤安可乘朝風占酒旆夜爨乞漁燈牛
渚逢新月秦淮想結冰故人他夕夢歌吹滿金陵

九日戲馬臺

常年節物此山川倦客登臨獨惘然戲馬臺荒年自久
射蛇公去事空傳黃華半老清霜後白鳥孤飛落照前
不與興亡城下水穩浮漁艇入淮天

長安在何許

二首

長安在何許疑在青天上矯首遡西風浮雲斷人望

二

長安在何許疑在白日下徘徊天一隅化月生新夜

叢臺歌

累土三百尺流光二千年人生物數不得待摧頽故址
秋風前武靈舊壠今安在禿樹無陰困樵采玉簫金鏡
未銷沉幾見耕夫到城賣君不聞叢臺全盛時綺羅成
市遊春輝一從凋輦閉荒草蕭散行雲無復歸招魂想
像風流在晴華露蔓猶依稀紆回棘逕掠人衣禾黍晚

成貍貉肥層簷壁瓦碎平地夢作鴛鴦相伴飛登臨弔
古將語誰城郭人民今是非指君看取古時物南有清
流西翠微彷徨華表不忍去豈獨遼東丁令威

秦淮夜泊

宮柳動春條秦淮生暮潮樓臺見新月燈火下雙橋隔
岸開朱箔臨風弄紫簫誰憐遠遊子心旆正搖搖

姜仲謙一首

己酉仲秋任才仲陳去非會飲岳陽樓上酒半酣

高歌大笑行草間出誠一時俊遊也為賦之

岳陽樓高幾千尺俯視洞庭方酒酣萬頃波光天上下
兩山秋色月東南興來鸞鵲隨行草夜永魚龍駭笑談
我欲煩公釣鰲手盡移雲水到松菴

周莘一首

野泊對月有感

可憐江月亂中明應識逋逃家客情斗柄闌干洞庭野
角聲淒斷岳陽城酒添客淚愁仍濺浪卷歸心暗自驚

欲問行朝近消息眼中羣盜尚縱橫

鄧潤甫一首

春帖

晨曦歛灩上簾櫳金屋熙熙歌吹中桃臉似知宮宴早
百花頭上放輕紅

蘇頌一首

春帖

璇霄一夕斗標東歛灩晨曦照九重和氣薰風摩蓋壤

競消金甲事春農

蘇庠一首

清江曲

屬玉雙飛水滿塘
菰蒲深處浴鴛鴦
白蘋滿棹歸來晚
愁看蘆花一片霜
扁舟繫岸依林樾
蕭蕭兩鬢吹華髮
萬事不理醉復醒
長占烟波弄明月

梁君貺一首

春帖

東方和氣斗回杓龍角中星轉紫霄聖主問安天未曉
求衣親護玉宸朝

魏泰二首

挽王平甫

二首

海內文章傑朝廷亮直聞黃瓊起處士子夏遽修文貝
錦生還怒江湖久離羣傷心王佐略不得致華勛

二

今日臨風淚蕭蕭似綆縻空懷徐穉絮誰立鄭玄碑無

力酬推轂平時憤抵巇何人令枉狀路粹豈能為

陳執中一首

賦御溝柳

一度春來一度新翠光長得照龍津君王自愛天然色
恨殺昭陽學舞人

潘檉一首

題釣臺

蟬冠未必似羊裘出處高時已熟籌但得諸公依日月

不妨老子卧林丘英雄陳迹千年在香火空山萬木秋
自笑黃塵吹鬢客愛來祠下繫孤舟

蔡肇一首

岳亭山嶺白龍穴

南山蓼蓼天作鼓號召諸龍盡行雨惟有禿角最先到
潑墨雲中雪鱗舞

許覲三首

紫騮馬

黃金絡頭玉為釵蜀錦障泥亂雲葉花間顧影驕不行
萬里龍駒空汗血露牀秋粟飽不食青藜苜蓿無顏色
君不見東郊瘦馬百戰場天寒日暮烏啄瘡

秋雨歎

霖雨不出動隔旬門前秋草長於人江湖浩渺欲無岸
錦石最小猶生雲微陽片月何曾見只有莓苔昏筆硯
田家黍穗未暇悲茅屋且為螢火飛

夢中詩

閒花亂草青春好秋鴻社燕年年歸青天露下麥苗濕
古道月寒人跡稀

許仲山二首

夢中作

山色濃如滴湖光平似席風月不相識相逢便相得

進和御製

輕寒慘慘透衾羅玉箭銀壺漏水多常是未明供御服
夢回頻問夜如何

方千里一首

題真源宮

萬歲丹霞府千函蕊芨書時時瞻絳節往往下雲車近
與剛風接高連上帝居登前望南嶽清蹕徹空虛

張先二首

贈妓

十載芳洲撫白蘋移舟弄水賞青春當時自倚青春力
不信東風解悞人

題西溪無相院

積水涵虛上下清
幾家門淨岸痕平
浮萍破處見山影
小艇歸時聞棹聲
入郭僧尋塵裡去
過橋人似鑑中行
已憑暫雨添秋色
莫放脩蘆礙日生

沈遼一首

古興

我不歎白髮安得新
少年往者不失勢
後來豈能賢世間
亦多士倚仗良有緣
寄語夸奪子古人已皆然

許彥國一首

虞美人草

嘗見諸選以此為曾子固詩後檢子固全集無此篇苔溪漁隱曰此詩許表民作而或以為曾

子宣夫人魏氏作大非也

鴻門玉斗紛如雪十萬降兵夜流血咸陽宮殿三月紅
霸業已隨烟燼滅剛強必死仁義王陵陰失道非天亡
英雄本學萬人敵何用屑屑悲紅粧三軍散盡旌旗倒
玉帳佳人坐中老香魂夜逐劍光飛青血化為原上草

芳心寂寞寄寒枝舊曲聞來似歛眉
哀怨徘徊愁不語
恰如初聽楚歌時
滔滔逝水流今古
漢楚興亡兩丘土
當年遺事久成空
慷慨樽前為誰舞

狄遵度四首

看白雲愛而成詩

秋風吹白雲觸處自何谷初猶半洞門
歛出遍巖腹零
落依水湄片段掛枯木餘影透微白
滅跡混空綠
烟蘿自翳密島淑徒縈曲
安知蒼梧野下覆猿鳥哭誰能久

徘徊返顧視黃鵠

紀夢詩

佳城鬱鬱鎖寒烟孤雛乳兔號荒阡夜卧北斗寒掛枕
木落霜拱雁連天浮雲西去伴落日行客東盡隨長川
乾坤未毀吾尚在肯與蟋蟀論大年

和渙之深秋月夜書事

洞庭葉下涼颼颼凍天頑白凝不流圓月擬缺不忍缺
輕露欲浮終未浮憶吹朱籟鳳輶上更採紫芝雲嶠陬

玉樓天半幾千尺珠樹玲瓏懸上頭

謁孔先生

月出高樹枝影動酒樽處樹深月色薄稍以燈火助主人喜我過斟酌亦云屢於時幸無累所談非近務涼風自遠至清景淡吾慮方期西山秋歷覽陪杖屨

孫覺一首

介亭

真人昔未起奔鹿駭四方連延天目山兩乳百里長有

地跨江海無種生侯王中宵燎穹昊列石表壇場朱旗
大梁野英氣吞八荒寥寥百年後故物已亦亡所餘陂
嶢巖峯巔屹相望主人承明老星斗工文章築亭紫霄
上坐客蒼林旁攀雲弄明月曉星生扶桑禹山隔波濤
簡書永埋藏願逢希夷使水土還故常

陳烈一首

題福唐津亭

溪山龍虎蟠溪水鼓角喧中宵鄉夢破六月夜衾寒風

雨生殘樹蛟龍喜怒瀾慙懃祝舟子移棹過前灘

盧襄六首

桐君祠作招仙詞

桐君歸來兮仙馭遠遊將何之寧不欲朝玉京兮升紫
微戴日月之冠兮披紫霞之衣佩蒼精之龍兮餐玉田
之芝友王喬與蕭史兮儼霓旌玉佩而歲時何如歸來
猿鶴慘兮怨空山川壑寂兮松桂閉胡不拂袖幌兮闢
一作雲闕藉芳草兮歌幽蘭庶乎遊山之人可以往還

姑蘇臺

姑蘇臺上麋鹿遊斷烟荒草令人愁姑蘇臺邊少行迹
宮殿無人土花碧當年伯業幾英雄轉首都歸血刃中
利劍一朝尸壯士白楊千古號悲風吳王羞歸九泉裏
西施空似桃花美子胥雖死過生榮越人却是奇男子

吳江懷古

秋風起兮鴻鴈歸秋月明兮白雲飛弔往古兮一霑衣

雍丘

蕃兵倚劍摩崆峒范陽兵火燒天紅潼關失守大將死
鑾輿播遷岷峨中貔貅兵甲照冰雪戈頭盡是生民血
鯨海揚波魚鼈腥中原盡作天山月二公擐甲怒攬槍
極關軍前背皆裂食窮愛妾膏斤斧愁蹙蛾眉氣如縷
花鈿寶髻誰復收壯士相看淚如雨霜刀抉齒肉未寒
再造皇家有英主雄心義骨填溝壑不得生榮肩李郭
論功初入鵲樓圖形已入麒麟閣

招隱

有玉人兮山之隅騎蒼龍兮歌步虛薜荔衣兮女蘿裙
餐瓊蕊兮披玉書朝玉皇兮游上都擗麟脯兮邀麻姑
胡不捨此而來兮吾與俱

又歌

日旋月轉兮能幾時人間不可以久留兮緇塵染予素
衣胡不讀青苔之篇兮歌白雲之詩玉書金簡號仙籍
兮留芳名其庶幾然後左蒼虬而右青螭飛羽蓋兮張
旗黃鵠引兮歸瑤池汝將捨此兮安之

張昌二首

遊真源宮

二首

漠漠山雲閣雨離離澗草搖風看處行穿空翠不妨小
駐孤筇

水末輕風索索雲邊小雨班班行盡丹霞林樾皖山下
看瀟山

孫覲六十三首

題臨川孝義寺壁

秋風嫋嫋轉庭梧客夢初驚一鳥呼揀盡寒枝棲不穩
獨行殘夜影同孤

次桂州

江上烟雲翠作堆倚天青壁鴈飛回神州一望三千里
不是南遷肯獨來

過楓橋寺示遷老

翠木蒼藤一兩家門依古柳抱谿斜古城流水參差是
不見玄都舊日花

吳門道中 二首

數間茅屋水邊村
楊柳依依綠映門
渡口喚船人獨立
一蓑烟雨濕黃昏

一點炊烟竹裏村
人家深閉雨中門
數聲好鳥不知處
千丈藤蘿古木昏

富陽道中

白帽炎州客
青裙酒姥家
微風搖浪扇
細雨落簷花
客舍休占鵬
蠻村欲饌蛇
會令醒復醉
高枕送生涯

春雨

小雨破春昏清風洗瘴氛
霏微花上見蕭瑟夜深聞
獨笑關幽事酣歌倚半醺
羈懷不堪寫危坐對爐芬

三山寺

二首

斜日半窗明無人獨掩扃
風鈴時自語雪栢老終青
立鵲參差見微泉斷續聽
老僧渾不語危坐卷殘經

二

異縣久為客窮途飽所更
對牀雲伴宿曳杖月同行
到

處身如寄看山眼
暫明平生飲中趣
酒賤且頻傾

次韻王子欽上元感事

寒雨吹黃屋
遙星照紫宸
龍沙萬里去
燈市七年春
感戀丹心折
悲吟白髮新
孤臣卧江海
老淚滿衣巾

蒙亭

小築三間足
雄包萬象并
遙波通極浦
落日抱孤城
小語千巖應
長歌百蟄驚
坐看衣屨上
漠漠晚雲生

鄭惇老謙老出示三賦

妙絕窺三賦雄奇想二豪望驚河伯歎却走季咸逃句
挾青丘大吟翻白雪高定知空驥北猶待九方臯

臨安道中

微流隱復見一曲宛秋蛇柳老蟲書葉潮平鳥篆沙青
鞋蹋雨滑烏帽倚風斜何處堪攜手宜城賣酒家

送鄭次賈歸臨川

徒步輕千里重臨賁一丘留歡不暖席索去忽扁舟惜
別猶班草傳聲可置郵躊躇搔白首獨上仲宣樓

疎山寺次白文林韻

翠幹軒軒迴出林，夜風吹籟紫簫音。
老龍頭角雲霄近，玄豹文章霧雨深。
末路浮榮吹劍首，半生遺恨寄琴心。
愁吟獨澣花前淚，故國山河百戰侵。

送張牧之赴南昌尉

青衫觸熱竝西州，沒馬黃塵接地流。
庾亮南樓應有待，薛宣東閣可能留。
官闌端為三升戀，興盡還從五斗休。
鱸出金盤堆白雪，秋江一葉認歸舟。

王左司致政還鄉

水滿滄浪舊釣磯
春風江上片帆歸
繁紅不見桃千樹
老幹空驚柳十圍
萬壑烟雲供坐嘯
一龕香火結真依
落花細草應堪藉
醉撼長條雪滿衣

興化朱公沒其子彥實過余於晉陵賦小詩以餞之

百感關心老淚潛
一垓埋玉卧空山
著鞭競看駒千里
閱管初驚豹一斑
貧病故侯今白髮
風流公子尚青綸

不須優孟追諧笑已見遺珠合浦還

謝景思提舉見過

璽書光麗九芝塗繡斧煌煌刺史車
當路狐狸那足問漫山藜藿未應鋤
使星尚拱天南極卿月終環帝北居
此夜光華賁岑寂故侯留落在郊墟

桐廬連夕大雨溪漲數丈徙寓白谷山上方閣

蒼莽川流會渾酣海氣噓蛟龍改窟宅
雷電走空虛殷地翻坤軸粘天浸日車
高僧欲盃渡遊客且樓居壯觀

真難值幽懷亦少攄翩翩一鳥去何必羨知魚

水退

蕩沃波瀾大憑陵意氣麤射潮蛟鰐怒鞭石鬼神驅雲
斷千崖立風行萬壑趨橋烏朝共起水鳥夜仍呼灩灩
紅昇曉霏霏翠撲膚浮楂卧泥滓狼籍滿街衢

胥澤民招隱

蒼茫夜氣合渺渺風露清藍輿兀醉夢翩若孤鴈征老
馬志萬里絡首喪其生十年飽芻豆立仗不敢鳴自識

酒中趣仍辭身後名皎皎一片心不受寵辱驚清風悲
永夜萬竅同一聲醉裏有歸路彷彿遊仙城

徙寓妙覺佛舍胥人民襍被相過賦夜坐

客居厭窮獨蓬艾翳環堵莊舄尚越吟鍾儀猶楚語吾
人有奇搽空洞見城府相逢逆旅中霧豹初一睹拘囹
賦囚山避謗憎市虎褰裳肯過我崖嶠走風雨微吟對
清夜破此五月暑墜露浥金莖空花墮犀塵孤燈映籠
紗冷艷翳復吐耿耿遂不眠逢逢聽晨鼓

妙覺寺適軒

古寺秋崖上清風掩半闌
晚花明艷艷曉溜落潺潺
松筴穿堦瘦苔窠蔽石斑
翹沙憐鷺靜抱葉看蜂還
心以空無累身從病得閒
儀曹獨何事終日賦囚山

靜老容安菴

離離風中花漂落任所之
汎汎水中萍流轉復在茲
靜公湖海士世網那得縻
獨有鐵石心不與燥濕移
巢肩繞靈鵲揜林餘老龜
區區了官事應解笑兒癡

宜黃尉李集義遣書問安否小詩為謝

三年著南冠兩見芳歲新朝為蟲蛇侶暮與魑魅隣行
隨水上坐卧對竹夫人獨有金石交不廢風雨晨書來
一弔屈我以屢厄陳嘖嘖爨下桐嗷嗷轍中鱗絙以朱
絲繩放之碧海津窮途得重惠肝膽大輪囷

礧巖

日上千峯亂風涵萬壑秋兩崖折天罅一水漲巖幽絕
巖飛橋過尋源秉燭遊倚空翹翠葆漱石走蒼虬老樹

攬天立犇雲接地流壯懷開浩浩病骨聳颼颼皓首殊
方去清樽盡日留無人與說似勝事滿南州

七星巖

十載汗修門簪橐侍帝垣五雲深莫窺衆星拱以繁一
坐牘背書身落海上村山川發餘想鐘鼓眩昔聞星圖
煥斗極兩兩錯地文今日復何日乘槎造天關日月起
可挾參井立能捫誰當揭其柄為我酌清尊

棲霞洞

飛仙巢三山弱水環四溟誰知黃茅嶺自有白玉京獨
曳一枝筇梯空上青冥蟾飛墮八桂石隕化七星幽幽
炬火然異狀不可名垂天紫雲蓋挿地翠羽屏已無俗
士駕尚有遷客經敢言居夷陋絕妙冠平生

曾公巖

羣峯依天立萬馬屹不動風敲紫玉珂雨暗青絲鞵相
君千里目渺渺孤鴻送披雲觀天巧鑿翠出巖洞中空
貫長虹側立剖大甕宛宛卧石梁欲起時地控玉棺已

上天甘棠有遺誦獨餘澗底泉時與幽人共

西山超然亭

厖區翳榛莽地瘴藏百怪西山何軒軒拔脚風塵外中
縈一線蟠側立兩壁對旁連九疑高遠控三湘孤亭
坐林杪俯見飛鳥背號弓泣二女禦魑竄四罪誰云窘
囚拘故自脫天械飄飄思凌雲萬里風雨會

別象州陳守容德

三年客殊方榮悴不堪說迢迢家萬里奄奄命一髮使

君古丈夫興衰在縲紲平生風馬牛舊識比鷦鷯欣然
一笑粲破此百憂結皇恩下天扉淚泣孤臣血行厨洗
玉盤載酒助懽悅庖珍間五鯖餅字炊十裂徙突今未
黔班草又一訣何須更秉燭端是夢中別

發桂林劉帥立道同諸司出餞於甘棠渡口

行盡海北天笑指江南路使君載酒醪擁節東城駐前
驅千燾直縱獵萬人呼塵流翳白日十里映黃霧何人
檄迎我一葦橫江渡渺渺倦鴉翻相隨歸薄暮

芳美亭

離離陌上花春到錦營中上冢千騎出竟天曉旌紅故
園已陳迹風流餘此翁渺渺山澗曲披披烟雨叢種枕
今着花千巖貯春風錦繡裏山谷遺民悲故宮

遂初亭

行有叱馭難坐有垂堂畏莫驅九折險輕用千金貴為
貧聊爾耳興盡我輒逝平生慕朱游肯汙薛宣吏清曉
挂笏坐西山有佳氣一笑食蛤蜊寧復知許事

洞庭善慶堂置酒小詩寄之

幽絕小蓬壺參差見畫圖
亂青山四出一碧水平鋪
洲萼紅相照沙葦細欲無
蓮房駢百子橘圃聚千奴
布穀休催種提壺且勸酤
楚腰飛燕燕秦缶和烏烏
便旋驚回雪嬋娟引貫珠
西風催畫鷁落日詠驪駒
浩蕩川原隔驚呼歲月徂
寥寥清夜夢直擬控搏扶

青氍堂

晉馬已老矣楚弓今得之
懷壁萬里至化鶴千歲歸
主

人有故巢鳩居不復棲俄驚桑田換已見城郭非偶尋
蕉中覆忽得囊下遺平生手所種老大今十圍故壁初
見蝎空牀尚支龜塞翁一笑喜共賦青氍詩

梅僊潭

潭潭雲幕垂樹杪秋磬發飛僊駕青鸞通籍在金闕遙
見切雲冠尚想凌波襪殷勤小梅花獨照黃昏月生綃
濕香霧翠袖卷烟雪忽然東風惡一夜吹石裂

甘陂莊院

張公卧江海戢羽如鵬蹲平生廊廟具投老三家村一
壑身所寄萬里心自存買花紅間坐種竹青滿門似聞
橘生奴漸見桐有孫提壺時見招一笑空壘尊

題宜興閭丘令巢鳳亭

少年有殊相瓠白作臞儒三吳山水窟見此紫鳳雛家
無擔石儲腹有萬卷書陳編踐芻狗博具抵牧豬手持
半段槍伎癢始一呼倒海探龍頷據地埒虎須有客持
釣樞大書表其閭盛事傳不朽畫入荆谿圖

西樓

層梯倚半空百尺卧元龍偃蹇一榻上崢嶸兩爭雄暮
捲珠簾雨夜鎮犀帷風吾公安在哉雲開指青紅俯視
大千界一器蚋滿中巢蚊幸有餘國蝸遂相攻湛湛天
一碧萬里磨青銅不落牛背上悠悠送飛鴻

湖狀上冢繫舟丁山田舍小憇

清溪三百曲一片春風綠茅屋有人家窈窕閔深竹老
去耽田里寓目快新矚風漪卷翠綃雲巘鏤蒼玉尋盟

喚白鷗解佩贖黃犢獨嘯無一人傳聲滿空谷

雪夜宿致思菴

霏霏竹間雨練練松上雪誰遺碧玉壺化作白銀闕孤
懷愜幽欣一笑暖栗冽寒光注老眼謂是山吐月耿耿
清不眠夜半聽竹折

泊德清龜谿亭遇大雨

崩雲四合千嶂重奔電一掣十里紅土囊叱咤萬竅風
狂翻石走昏相蒙疾雷破柱鞭老龍百賈顛沛市井空

銀河倒傾千丈硤魚鼈欲取山為宮洪濤衝天怒相攻
大舸吹簸如飛蓬醉卧掀舞一葉中洗戈雲夢芥帶胸
忽然變滅何匆匆雷公收聲電改容烟舒霧捲縈長虹
紺碧萬頃磨青銅溪邊結網南巷翁白髮黃馘射兩瞳
赤鯉騰出無留蹤刻舟求劍何時逢

鄒次魏黃善長攜文見過小詩為謝

鄒郎英妙知名久筆端自有談天口客舍相逢一樽酒
衆星錯落見箕斗高談欲追牛馬走長劍忽作蛟龍吼

餘子碌碌那得友江夏無雙亦其偶我觀二妙屠龍手
青紫紛紛何足取他年要作中興碑大字磨崖繼聲叟
吳益先攜文見過以詩為謝

千里之馬初服輶風驟霧鬣跨九州駕鹽挽磨三十秋
俯首尚與鶩駘遊吳郎人中第一流文采絢爛珊瑚鉤
陽春白雪和者不夜光明月暗中投魯人不貴東家丘
吾髯凜凜青兩眸撻金戛玉聲相求屬鏤雙螭九地幽
午夜氣出干斗牛忽然化作長黃虬睚眦之怨何足讐

一麾立斷樓蘭頭

題靈巖五至堂

老人昔記觀何處白髮蒼顏只如故湛然不與生滅期
始信真心有常住公今忘物兼忘我坎止流行無不可
桑下了無三宿戀壁間一坐九年過振履忽逐秋鴻往
浮杯又趁春潮上一片孤雲自在飛不落人中去來想
致政運使直閣朱公挽詞

二首

握節來金馬飛芻上木牛能令天粟雨故作地錢流望

實傾三館賢勞閱百州寥寥千古恨零落掩山丘

二

蕭散烏藤杖風流白接羅分茵前席滿載酒後車隨食
鼎羅千指歌鍾擁十眉淒涼今夜月空照君家池

致政左司公挽詞 二首

東海懷疏傳西州憶謝公劍飛衝夜斗桂折卧秋風塵
暗芸堂冷香凝粉署空潺潺千斛淚忍看一旌紅

二

解組天門上揮金里舍旁漸欣雙髯滿仍見一瞳方舊
說山中相今為地下郎流芳知有在鸞鵠正翱翔

天台太守端明胡公挽詞

二首

天上文昌省人中翰墨仙尚書心似水學士筆如椽視
草金蓮夜哦詩錦瑟年玉樓方斷手又著紫鸞鞭

二

遮門皓首啼行路涕交揮不見斑衣好空隨畫翣歸蘭
芽方獨秀華萼尚交輝試待遼東鶴千年有令威

宣撫簽書胡公挽詞

幕府分弓日
轅門叱馭時
捫星高厯井
修月上騎箕
翳面降人泣
聞輦聖主思
龍驤老賓客
競賦八哀詩

光祿董公挽詞

二首

舊學江都相
遺忠太史家
絳帷今寂寞
青簡尚光華
謾奏三千牘
猶傳四十車
諸生半齊魯
東望涕橫斜

二

帳殿旌旗捲
轅門鼓角悲
江邊五馬渡
天上六龍飛
感

憤冠衝髮追攀時見衣興元戡難日零落寸心違

惠彥達承事挽詞

鳩杖尊三壽龜牀閱九齡名留高士傳光掩少微星
圯下無遺躅江邊有獨醒潭潭餘慶在鸞鵠滿家庭

大資政張公挽詞 二首

大筆文章手飛揚獨妙年判花森玉筍視草對金蓮
講肆聯重席宮花卧八埭他年紬石室妙絕冠遺編

二

禮絕邀三顧恩榮閱九遷秉鈞平似砥履坦直如弦晉
室和戎日周家定鼎年金甌方卜相飈馭已超然

霍彥明通判挽詞

契濶艱虞地匆匆喜一逢俄驚門上莠已化桺中龍手
板歸囊楮腰章掩窆封空餘故人淚灑向九泉重

通川太守錢公挽詞

舞鳳來天目馮熊竝海門盡捐牛犢佩爭詠袴襦恩雁
塔名猶在崇郊菱故存龍池飛霹靂空記刻舟痕

少保張公挽詞

平土疎新渥覃恩洞九泉
印懸金斗大冠珥玉蟬
連墜劍今亡矣鳴珂尚宛然
風流春月柳無復似當年

領省樞相太傳信安王挽詞

秉燭聯飛蓋分茵託後車
兵厨千日酒記室五雲書
尚想儀型在那聞語笑餘
龍鍾隨葬紼老淚落衣裾

太令人施氏挽詞

天上駉鸞鶴人中夢虺蛇
舒長真化國青白舊儒家
朝

籍通丹地宮衣曳紫霞蓬萊三萬里何處問靈槎

宋藝圃集卷十二

欽定四庫全書

宋藝圃集卷十三

明 李袞 編

馬定遠四首

楊休烈村居

籬落牽牛放晚花
西風吹葉滿人家
閉門久雨青苔滑
時見鴛鴦下白沙

郢州城西

秋江白水浪花麤墟落人歸鳥自呼新月高城三百雉
角聲吹徹小單于

村居

溪頭梅是去年花閒日初長竹逕斜向晚孤烟三十里
不知樵唱落誰家

秋日書事

井邊薏苡吐秋珠舍下瓜區雜芋區世道未夷聊小隱
不須辛苦著潛夫

馬存三首

邀月亭

亭上十分綠醕酒盤中一筋黃金鷄
滄溟東角邀姮娥
冰輪碾上青琉璃天風洒掃浮雲沒
千岩萬壑瓊瑤窟
桂花飛影入盞來傾下胸中照清骨
玉兔擣藥與誰餐
且與豪客留朱顏為君殺却蝦蟇精
腰間老劍光芒寒
舉酒勸明月聽我歌聲發
照見古人多少愁更與今人
照離別我曹自是高陽徒肯學羣兒嘆圓缺

中
去二
句
覺勝

長淮謠

長淮之水青如苔行人但覺心眼開湘江豈無水魚腹
忠魂埋但見愁雲結雨猿聲哀浙江豈無水鷓鴣漂胥
骸但見潮頭怒氣如山來孤臣詞客到江上何以寬心
懷長淮之水遠楚流先生家住淮上頭黃金萬斛浴明
月碧玉一片含清秋酒光入面歌一聲淮上百物無閒
愁

燕思亭

李白騎鯨飛上天江南風月閒多年縱有高亭與美酒
何人一斗詩百篇主人定是金龜老未到亭中名已好
紫鱗肥時晚稻香黃鷄啄處秋風早我憶金鑾殿上人
醉著宮錦烏角巾巨靈摩山洪河竭長鯨吸海萬壑貧
如傾元氣入胸腹須臾百媚生陽春讀書不必破萬卷
筆下自有鬼與神我曹本是狂吟客寄語溪山莫相憶
他年須使襄陽兒再唱銅鞮滿街陌

曾肇一首

上王荊公墓

天上龍胡斷人間鵬鳥來
未應淮水竭所惜泰山頽
華屋今非昔佳城閉不開
白頭門下士悵望有餘哀

曾鞏二十一首

將之江淞延祖子山師柔會別飲散獨宿孤亭遂
書懷別

蜀客向何處欲觀浙江潮
艤舟吳門柵况會故人招
置酒吳亭上無人吹紫簫
浩觀萬物變颼爾生涼颼
遂恐

時節晚芳蘭從此彫功名竟安在富貴空寥寥鴻鵠舉
千里鸞鳳翔九霄胡為蓬蒿下日夜悲鷦鷯車馬夕已
還行人亦飄飄浩然滄海志寂寞守空宵

上人

金節橫光馬珂開瑞鵲宮袍腰玉繞烟沙轆轤高軒過
路上千人瞻羽纛瑤魁精彩浮蒼龍江城四面生春風
城中壞屋書籤碧有客苦吟連旦夕麻衣塵暗抱書泣
歲暮黃梁不供食白日曛矔望龍坂坐上一言寒口暖

西入天關灑霖雨須惜窮鱗在泥土

江上懷介甫

江上信清華風月亦蕭洒故人在千里樽酒難獨把由來懶拙甚豈免交游寡朱絃任塵埃誰是知音者

舞鶴

蓬瀛歸未得偃翼清溪陰忽聞瑤琴奏遂舞玉山岑舞罷復嘹唳誰知天外心

戲呈休文屯田

陳侯雋拔人所羨歲晚江湖初識面已聞清論至更僕
更讀新詩欲焚硯天子無由熟姓名諸公固合思論薦
烏韉況已踏臺省黑綬未得辭州縣落落逢人愈難合
欣欣顧我能忘倦跬步麤官別經歲角巾廣坐今相見
遶郭青山疊寒玉紫隄遠水鋪文練明紅靚白花千樹
隔葉跳枝鶯百轉佳時苦雨已蕭索落蕊隨風還面旋
縱無供帳出郊野尚有清樽就閒燕脫遺拘檢任真率
放恣嘲諧較豪健東廊解榻不共語明日離亭空眷眷

七月十四日韓持國直廬同觀山海經

高閣在清禁長軒憑廣虛御幄閱圖象依然臨幸餘翠
甍布天路黃簾分直廬一雨清景早稍涼秋興初解帶
就君坐臨牀闕素書山海所錯出飛潛類紛如此語果
虛實遺編空卷舒自笑正豕亥更微注蟲魚君材合遠
用就此固已疎如我乃斯幸地閒容寄居竹影散良席
花香浮廣裾俯仰自足適歸時更當徐

李節推亭子

旰江郭東門江水湛虛碧東南望羣峰連延倚天壁長
林相蔽虧蒼翠浮日夕青冥窗戶寒居者非咫尺初
得從誰有此煙霧宅燕坐遠世喧及門無塵客築亭更
求深緩帶聊自適時花笑婀娜山鳥吟格磔家釀熟新
樽歡言命良席故已輕華簪寧論珍拱壁我亦有菑田
相望在阡陌安得巾柴車過從獲三益

秋夜露坐偶作

白雲飛向低清露泣猶早風來亦依微濁暑焉能掃客

堂虛四楹洒水恨枯槁喜茲宵漏初露坐散襟抱明河
帶飛觀月白通馳道顧眄塵慮銷瓶泉謝頻倒恨無同
聲人詩義與探討跼蹐拂方牀歸臥夢亦好

遊金山寺作

候潮動鳴艫出浦縱方舟舉箔見茲山巋然峙中流朱
堂出煙霧縹緲若瀛州十年入夢想一日恣尋遊屐履
上層閣披襟當九秋地勢已瀟灑風颭更颭颭遠挹蜀
浪來旁臨滄海浮壺觴對京口笑語落揚州久聞神龍

伏况覩鷺鳥投行緣石徑盡却倚巖房幽頗諧雲林思
頓豁塵土憂昏鐘滿江路歸榜尚夷猶

芙蓉臺

芙蓉花開秋水冷水面無風見花影飄香上下兩嬋娟
雲在巫山月在天清瀾素礫為庭戶羽蓋霓裳不知數
臺上遊人下流水柱脚亭亭插花裏闌邊飲酒權女歌
臺北臺南花正多莫笑來時嘗著屐綠柳牆連使君宅

招隱寺

一徑入松下兩峰橫馬前攀緣綠蘿磴飛步蒼崖巔昔
人此嘉遯手弄朱絲絃想當林間月獨寫山中泉此樂
非外得肯受世網牽我亦本蕭散至此更怡然獨憐最
幽處流水鳴澌澌

漢陽泊舟

暫泊漢陽岸不登黃鶴樓江含我岷氣萬里正東流驚
風孤鴈起蔽日寒雲浮祗役雖遠道放懷成薄遊興隨
滄洲發事等漁樵幽烟波一樽酒盡室載扁舟

送鄭州邵資政

江夏無雙譽
菑州第一才
笑談成黼藻
咳唾落瓊瑰
紫氣鋒鋦露
青冥羽翼開
雋遊追幕府
高步集蓬萊
探討篇章洽
研磨術業該
九霄新漢邸
萬目注梁臺
選擇真儒用
招延急詔催
衣冠驚角綺
賓友重鄒枚
每右橫經席
寧寧虛置醴
杯八荒披日月
萬里散雲雷
始去東山榜
俄參北斗魁
廟堂竒計得
羌敵驚心摧
帝念人求舊
朝須汝作梅
避榮言屢切
請外志難回
際海歸封略
連吳

入剗裁夕冰承命出畫錦過卿來許國風猷壯容民宇
量恢節旄恩換鎮京室地稱陪賜覲親中宸通班接上
台壺漿空度洧公位在三槐

錢塘上元夜祥符寺陪客臣郎中文席

月明如晝露華濃錦帳名郎笑語同金地夜寒消美酒
玉人春困倚東風紅雲燈火浮滄海碧水樓臺浸遠空
白髮蹉跎歡意少強顏猶入少年叢

寄鄆州邵資政

蒙問敝邑山水之景見索新詩
重意之辱謹咏二百字上寄

鉛筆讎書客朱轡守土臣素餐方側席黃髮已侵巾喜
有山園郭仍憐水滿津清華閒耳目瀟灑長精神秀色
秋來重寒聲雨後新宿雲依戶牖流月過松筠北圃分
殊境西湖斷俗塵渚花紅四出沙鳥翠相親茭老含珠
實魚驚躍錦鱗飛梁凌宵眇虛榭壓齋淪嶺對橫脩竹
洲分抱白蘋靜宜人事拙閒覺道腴真器小難周物官
微幸此身簿書偷暇日杖屨想幽人沂險飛遊艇探竒
漾釣緡形縻甘鶴怨心泰得鷗馴督府恩容久芳牋問

訊頻門庭嚴衛戟尊俎自華紳却起烟霞興還思水石
鄰自嗤田父樂那可薦鴻鈞

憶越中梅

浣沙亭北小山梅蘭沼移來手自栽今日舊林冰雪地
冷花幽艷向誰開

寄致仕歐陽少師

四海文章伯三朝社稷臣功名垂竹帛風義動簪紳此
道推先覺諸儒出後塵忘機心皎皎樂善意淳淳大略

才超古昌言勇絕人抗懷輕紱冕憑懇謝陶鈞耕稼歸
莘野畋漁返渭濱五年清興屬一日壯圖伸北闕恩知
舊東宮命數新鸞鳳開羽翼驥馭放精神曠達林中趣
高閒物外身揮金延故老置驛候嘉賓主當西湖月勾留
潁水春露寒消鶴怨沙靜見鷗馴酒熟誇浮蟻書成感
獲麟激昂疎受晚冲淡赤松親龍臥傾時望鴻冥聳士
倫少休均逸豫獨往異沉淪策畫咨詢急儀刑矚想頻
應須協龜筮更起為生民

閱武堂

五朝坏冶歸皇極萬里車書共太平邊馬不窺光祿塞
漢家常隸羽林兵柳間自詫投壺樂桑下方安佩犢行
高枕四封無一事腐儒何幸偶專城

鶴山亭

大亭孤起壓城顛屋角峩峩挿紫烟灤水飛綃來野岸
鵲山浮黛入晴天少陵騷雅今誰和東海風流世謾傳
太守自吟還自笑歸來乘月尚留連

西樓

海浪如雲去却回
北風吹起數聲雷
朱樓四面鉤疎箔
臥看千山急雨來

和史館相公上元觀燈

九衢供仗豫游歸
寶燭星繁換夕暉
傳醖未斜清禁月
散花還拂侍臣衣
天香暗度金虬暖
宮扇雙開彩鳳飛
法曲世人聽未足
却迎朱輦下端闈

王俊民一首

遇桂英

謝氏筵中聞雅唱何人戛玉在簾幃一聲透過秋空碧
幾片行雲不敢飛

胡志道六首

縉雲山

仙都古洞天雲闕高巖竊新宮欣然成碧瓦燦鱗列我
時宿瑤房六月失煩熱松聲起中夜夢枕忽驚輟天籟
鳴虛徐玉簫遞冷徹鳳歌諧律呂鶴舞相應節安知非

羣仙宴罷搖珮玦從來箏笛耳一洗萬想滅

黃帝祠字李陽冰篆

李侯神仙才宇宙在其手古篆誇雄奇鐵柱貫金鈕標
榜黃帝祠字畫氣渾厚想當落筆時雲夢吞八九每傳
風雨夜蜿蜒龍蛇走光怪發岩竇草木潤不朽鬼物煩
撓訶一旦忽失守隨煙遽飛騰無復世間有因訪山中
人石刻尚仍舊誰能一新之易若運諸肘

競秀軒

幾年因塵鞿厥狀浸成俗此來夢魂清勝賞得林麓羣
峰綰烟鬟炯炯皆在目寒碧冷相射秀氣還可掬我詩
三伏中清風起幽谷只恐吹我衣化為雲錦服汗流籍
湜輩上下相追逐

仙水洞

升巍躡層巔雲陞近百尺平生塵土足到此還幾歷有
岩中枵然斧鑿若天劃玉泉出石罅雨點散寒碧我來
供茗事松鼎煮瓊液餘甘生齒頰可以醒醉魄永懷鶴

髮翁

謂周景復嘗居於此

四顧但空壁似聞便仙去山間謾留鳥

初暘谷

山嵐鬱蒼蒼溪水流浩浩紛然世上人換易如秋草奇
哉三洞天連路極深窈陽崖時朝曦先見扶桑曉誰能
餐九華顏色端使好仙翁蟬蛻去遺迹不可考我來愜
登臨幽事費尋討悲嘯聞澗猿啁哳聽啼鳥平生憤懣
意到此始一掃行將袖手版汗漫遊八表

詠縉雲山

茲山何巍巍欲上捫蘿蔦怪石虎踞蹲老卉虬夭矯中
有古洞天劃然若天造爰從開闢來日月自昏曉神龍
此蟄蟠雪玉吐冰珠每逢歲旱乾山老必見禱顧盼層
雲生掀舞百川倒何時謝魚蝦昂霄騰浩渺

徐積四十一首

莫望草

為潞公作

莫望坡頭日日色催行人莫望河上草草色空連雲雲
邊芳草路茫然是何處行人望不見草色自如故

貧女扇

妾有一尺絹已為身上衣自織清溪蒲團團手中持朝
尋麥隴去暮汲水泉歸無人不看妾不使見娥眉

述懷寄呂師

君看關西山壁立春雲突盡春空窄濃嵐滴去渭川寒
孤峯深與秦天碧白雲流水豈無情立馬吟詩定相憶
且倩東風先寄聲我整西裝期已迫吟到秋風放我歸
歸來待作瀟湘客

送張九掾兼簡同事錢明府可與慎叔良蔡彥規
同一笑也

有人獨酌南窗酒春是故人詩是友故人消息在江南
為我江頭探楊柳詩人見春雙眼明迎春送春俱有情
何況溫溫張九掾可無詩句贈君行

送王潛聖

公車待報凡幾年蕭生罷去今浩然監瀆野中尋舊隱
揚子江頭呼渡船太湖波浪濕秋天洞庭橘柚生紅煙

馬踏新霜吳嶺外猿啼小雪建溪邊關西夫子雖遲暮
行笑行吟正安步菑川海上牧羊兒亦說公孫放豚去

此詩措
意難解

送陳長官赴衡陽

楚天搖落霜風早山色依依江渺渺洞庭水寒帆影孤
鴈聲正在衡陽道君不見屈原憔悴賈生天遺恨至今
猶未了日晚江頭船住時行人莫望江邊草

和倪敦復

縣令醉時花滿睫縣令臥時雲滿榻其時北面竹軒涼
雨聲霎罷風颯颯美人爭唱醒酒歌濕透紅綃聲未匝
玉容沃以沉香水瑤槃凍屑珠璣雜魂夢適從何處來
帳中猶把浮雲踏自說騎鸞向閨風到時玉洞諸仙合
只被桃花迷殺人行顧瑤關忽雙闔枕上猶能走筆吟
累累吐出珠千哈壓倒唐時白與元兩翁相顧如何答
恨君不作洛陽客

余雖不作洛陽客自有吟魂兼醉魄吟魂醉魄御風行

看盡千花萬花色寧知洛浦有人留
挽定春山歸不得
脫身誤入嵩山中山中逢見白鬚翁
懼然借我雙金童
須臾引入花林中亂花深處迷西東
花光照天香薰空
金盆挹酒雙瑤鍾酒酣邀我吟春風
紺雲千丈揮玉虹
搜羅萬變窮神功有人飛下紫霄峰
酬詩解佩聲玲瓏
余方却步不與語笑余不似鄭交甫

夢中作

詩翁吟袖忽翻然便脫紅塵騰紫烟
一身病骨如生翅

兩道銀河不用船，奔星相隨趁明月。鳴鸞引去追飛仙，琅玕樹下夜宴起。雲童為汲瑤山水，仍遣詩筒寄閨風。詩筒落下煙霞中，人間知是吟哦翁。舉頭齊望青冥空。

誰何哭

誰何哭哀且危，白頭母朱顏兒。兒忽舍母去，母何用生為？架上有兒書篋，中有兒衣兒聲不復聞。兒貌不復窺，誰何哭哀復哀。腸未絕心先摧，母恃兒為命。兒去不復來，朝看他人兒，暮看他人子。一日一夜間，十生九復死。

君不見昨夜人靜黃昏時含辛抱痛無人知其時忽不
記兒死倚門引頸望兒歸

閔災詞

并序

春秋大雨大小震電皆書今淮南不幸有此變
故故作閔災詞以弔之

神地出淵泉商羊向天舞電火燒黑空雷車震金鼓大
塊噫風吹黃沙黃沙須頃化為霧此時陰氣一何盛蚓
噓雲兮鬼嘯雨雨繩繩兮雲蒸蒸天慘慘兮朝復暮嗟

爾長淮之民何生而苦方饑而饑方疫而愈巧有此患
普及於汝地湧水泉天降淫雨浩浩之勢包山逾阜汝
居無廬汝耕無土汝口嗷嗷其將安訴吾聞堯水凡九
年民雖昏墊不失所願我君王發德音一變悲號作歌
舞

劍山

此劍曾將赤霄倚雲雷欲戰秋風起攜下赤霄磨玉山
玉山色變龍蛇寒霜飛浪活河漢清星辰日月分光明

天生神物不可犯曾向人間誅不平玉龍不死常在腰
一抹血腥猶未消莫教望見延平水待與人地除凶妖

謫仙

我是蓬萊山上客暫到人間管春色謝家池館聳吟魂
卓氏酒壚閒醉魄人間春色將奈何潏潏灩灩濃如波
歸來說與秦王女麻姑偷去唱為歌

送王潛聖

一自渡江津茫然不記春船諳淮上月馬慣洛陽塵可

去問唐舉未須慚買臣終令舊關吏還似棄繻人

神宗皇帝挽詞

顧託艱難后宮城盡閉關師屯五校肅日馭六龍閒易
貯金莖露難尋玉府山裕陵人散後猶望白雲間

耳邊啼鳥喚不起

耳邊啼鳥喚不起有人醉臥春風裏被花迷入夢魂中
却上煙霞并瑤水

釣者

有人口誦浮雲曲手把瀟湘一竿竹荻花洲上築茅庵
坐看江頭浪如屋

贈山翁

耳聽人言似不聞心於時事若無分一生已是青山客
更欲將身換白雲

戲呈魏評事

紫府瑤闌夜更深阿誰閒醉洞中春呼童去問煙霞事
只見桃花不見人

答魏老

滿面春風醉落暉
滿頭紅艷帶花歸
醉眠自有風流格
不是無人為解衣

一片山中雲自飛
葛巾有酒琴無徽
陶公自是秋風客
不見黃花未肯歸

天都山

天兵十萬著犀衣
手執金幢踏彩霓
龍共玉麟相次列
羣鸞班在鳳凰西

早朝仙

紫瑤闕上煙霞曉赤玉階前劍佩齊十二金童傳詔罷
雲冠星弁一時低

朝回仙

匆匆朝罷九重天便按蓬萊御紫煙
趁得蟠桃花下宴
鼓簫諸部約三千

貴仙

鳳節霓旌擁萬神五雲車騎駕龍麟
腰間獨佩黃金錄

元是瑤宮第一人

醉仙

曾共諸仙宴紫微
金鍾插羽疾於飛
醉魂已望三山去
猶整華冠齊羽衣

醉起仙

佩環聲動出金華
鳳引鸞隨入絳霞
行到瑤臺雲路狹
側身趨避玉妃車

棋仙

壺中白日何曾夜
洞裏桃花別是春
一局閒棋猶未了
坐中老却採樵人

夜宴仙

閨闔宮中夜宴開
手揮明月坐瑤臺
不教偷藥姮娥到
却放投壺玉女來

困仙

洞中一覺春風夢
落盡桃源萬樹花
竈上丹砂尋不見
騎鸞誤入阿誰家

太平仙

誰知我是太平仙歌罷浮雲天暮烟更倚玉樓吟樂府
斷虹消盡月明天

雪仙

九重天路忽難通誰與傳書寄閭風鶴馭三千無處覓
銀潢萬丈一時空

望仙

好雲消盡鶴空來一去麻姑更不回紫府路從何處去

碧桃花向夢中開

無妄仙

清風窗外雲初去
明月池中鶴自還
春色一簾閒睡過
瑤花落盡不抽關

希夷仙

紅塵舊學今雖廢
紫府新書近已齊
三十六宮俱不見
玉函金鎖印龍泥

水仙

曾乘秋浪泛銀河撥盡閒雲恣浩歌
明月一環來拂面
玉龍十萬總隨波

晨起仙

帳外雙童持劍履一榻紅雲睡
初起滿面清風漱月華
銀槃更挹瑤池水

童仙

憶昔為兒跨竹梢誰何傳與太平謠
如今羽化已千載
綠鬢朱顏更不彫

茶仙

賜得龍田不種花
常攜瑤水灌煙霞
誰將玉樹雙枝換
只得春前一寸茶

玉妃

琳琅宮殿本無塵
猶跨青鸞踏紫雲
怪得曉來天色淡
海霞都在玉妃裊

麻姑

不道風塵良苦辛
却停仙仗醉紅塵
青鸞一去無消息

只被麻姑誤殺人

淮之水

淮之水淮之水春風吹春風洗青於藍綠染指魚不來
鷗不起激激灩灩天盡頭祇見孤帆不見舟殘陽欲落
未落處盡是人間今古愁可奈何可奈何莫使騷人間
棹歌我曹盡是浩歌客笑聲酒面春風和

宋藝圃集卷十三